

9
JACOBI HVTTER,
MED. DOCT.
TRACTATIO MEDICA
QVA

SENECTVS
IPSA MORBVS
SISTITVR

Das ist:

Daß das Alter an und vor sich selbst eine
Krankheit seye.



HALÆ MAGDEBVRGICÆ, 1732.
Typis IO. CHRISTIANI HILLIGERI, Acad. Typogr.

EXCELLENTISSIMO AC ILLUSTRISSIMO
DOMINO,

DOMINO
STEPHANO WESSELENYI
LIBERO BARONI
DE HADAD,

ACRÆ CÆSARÆ REGIÆQUE CATHOLICÆ MAJE-
STATIS CONSIL. STATUS, VT ET IN TRANSYLVANIA INTIMO,
CLYTORVM DOMINORVM DOMINORVM STATVVM, TABV-
LÆQUE JVDICIARIÆ REGIÆ TRANSYLVANIÆ PRÆSIDI
ET COMITATVS MEDIOCRIS SZOLNOCK
SVPREMO COMITI

NEC NON

NEC NON
SPECTABILI AC GENEROSO
DOMINO

DN. SIMONI DE BAVSSNERN

SACRÆ CÆSARÆ REGIÆQUE CATHOLICÆ MAJ
STATIS CONSIL. AVLICO TRANSYLVANO
ELECTO JVDICI REGIO CIVITATIS CIBINIENSIS
ET COMITI NATIONIS
SAXONICÆ

VT ET

SPECTABILI AC GENEROSO
DOMINO,

DN. MICHAËLI CZECKELIC
DE ROSENFELD,

CONSVLI CIVITATIS CIBINIENSIS
AMPLISSIMO

DOMINIS ET PATRONIS
SVIS GRATIOSISSIMIS


INAUGVRALEM HANC DISSERTATIONEM

humillima mente offert

A V T O



PROOEMIUM.



In signis hodiernorum & antiquiorum Philosophorum æque ac Medicorum quæstio torfit & exercuit ingenia : cur homini necessario moriendum sit? Diversi in diversas abierunt sententias. Recepta jam per aliquot secula ad hanc quæstionem fuit responsio, mortem homini idcirco necessariam esse, quoniam anima a corpore suo dissolvatur, quare & mortis natura in dissolutione animæ a corpore a multis Philosophis est collocata. Verum ubi urgetur ulterius, cur anima dissolvatur a corpore? nihil lucis ex antiquitus usurpata hac mortis definitione ad naturam ejus intelligendam derivari potest. Nonnulli cum Helmontio & asseclis flammulæ vitalis & calidi innati defectum pro causa allegarunt; quæ vero nihil præter puram vocem habet in recessu. Alii plus lucis

ex revelationis lumine hausturi respondent, constitutum esse ab Aeterno Numine, ut homo moriatur, ob fatalem protoplastorum lapsum; sed nec hinc, in quonam mors consistat, quispiam intelliget. Quibusdam placet animæ motus vitales administrantis languori & fastidio ulterius in corpus agendi id tribuere; sed longe nimis petita est ratio, & claro ac distincto conceptui penitus contraria. Quis enim credet, Deum T.O.M. animæ, seu naturæ humanæ eam vim concessisse, ut pro lubitu corpus morti exponere possit? annon hoc pacto quivis hominum *αὐτόχρεια* habendus? cur, si habet hanc potestatem, non discedit anima a corpore in his, qui violentis suppliciis morti traduntur, & qui mortem valde anxie expetunt? Sed ex quo fabrica corporis humani per solertiores anatonen accuratius lustrari, & in Philosophia nihil, quod claro conceptui repugnat, pro vero haberi cœpit, aliam & solidiorem mortis rationem reddendam esse, judicatum fuit. Præstitit id primus Illustris ac Celeberrimus Dn. FRIDER. HOFFMANNVS, Patronus ac Præceptor ad urnam colendus, & claram ac distinctam mortis explanationem exhibuit, ex qua ratio reddi etiam potest, cur homini absolute moriendum sit, & quomodo successu temporis ætas ipsa ad mortem disponat sine concursu ullius causæ violentæ & morbosæ. Ego cum in præsentiarum Inaugurali quodam specimine profectus meos in arte salutari sim declaraturus: minime inutile negotium suscipere me arbitratus sum, si *senectutis considerationem* eligerem, quæ via secundum ordinem naturæ est ad mortem, & afflic-
ctio-

ctiones, quæ ex Senectutis vitio in corpus redunt exponerem, causas vero, cur fiant, subjungerem. Inductus sum vulgari illo proverbio, quod ipse jam professus est Terentius: Senectus ipsa morbus est. Sistam itaque in præsentiarum senectutem ipsam morbum. Divinum autem Numen benedictione sua cœlesti mihi adsit.

§. I.

TRactationis nostræ ordo exposcere videtur, ut cum in præsentī Inaugurali Dissertatione de *Senectute ipsa morbo* acturi simus; quid per Senectutem intelligamus; deinde quomodo Senectus morbus nominari possit, explicemus. Quantum itaque ad Senectutem attinet, res est in vulgus adeo nota, ut nulla opus habeat declaratione. Quis enim est, qui ignorat, per eam denotari hanc ætatem, in quæ vitæ finis secundum ordinem naturæ imponitur. Nemo est, qui ignoret, vitæ nostræ curriculum ab ipsis antiquissimis etiam Medicinæ Scriptoribus in certa intervalla distinctum fuisse. Sic Hippocrates in Libro de ætate in diversas ætates vitam humanam dispescit, & quamvis harum septenario annorum numero metitur. Nam in ejusdem fragmento ex Philone Judæo hæc exstant verba: *In hominis natura sunt septem tempora, quas ætates vocant: Infans, puer, adolescens, juvenis, vir, senior, senex: Infans est usque ad septem annos ad dentium amissionem; puer vero usque ad genituræ ortum; adolescens usque ad barbæ lanuginem ad ter septem; juvenis usque ad auctionem totius corporis ad quater septem; vir usque ad undequingagesimum ad septies septem; senior usque ad quinquaginta sex ad septies octo; dein*

deinceps vero Senex est. Galenus vero in aliam abit sententiam dum in Libro de tuenda sanitate Capite II. inquit: *ætates exquisito annorum numero alligari non possunt.* Re-
 jecta itaque hac Hippocratis distinctione in tres periodos vitæ humanæ spatium dispescit. Nam Libro II. de temperamentis Cap. 2. vitam hominis distinguit in *statum incrementi, vigoris, & decrementi.* Unde vero factum sit, ut ipsis Medicinæ patribus placuerit vitam humanam in certas ætates dividere, & quid per ætatem intelligendum sit, erudite exponit Cels. Verulamius Lib. III. Cap. X. de ætate inquit: *Dum ad extremum vitæ spatium homo contendit, plurimas mutationes necessario sustinet, has qui annorum spatiis & intervallis dimensi primum discreverunt, simul ætates appellarunt, ut sit ætas id vitæ curriculum, quo luculenter corporis constitutio per se suoque nutu mutatur.* Nos itaque eam ætatem hic per Senectutem intelligimus, quæ secundum Galeni sententiam status decrementi dicitur; secundum Hippocratem vero ab anno unde quinquagesimo numerari incipit & ad finem usque vitæ protrahitur. Fusius quoque & uberius hæc explicuit Illustris Dominus Frid. Hoffmannus in Dissertatione de annorum Climactericorum rationali & medica explanatione.

§. II.

Cur Senectus morbus nominetur.

Cum vero jam mentem nostram exposuerimus, quid per senectutem intelligamus; e re est, ut quomodo, & cur senectutem morbum nominemus, declaremus. Sunt autem hæc verba: *Senectus ipsa morbus est, multæ & amplæ significationis.* Non enim dicitur, Senectus est morbosus, seu Senectus habet magnam ad morbos dispositionem,

nem, verum expressis verbis inquit : *Senectus ipsa morbus est.* Neque vero a vero hæc Terentii verba aberrant; cum in sequentibus sim ostensurus, quod sicuti morbus vires depascit, & functiones totius corporis pervertit; non secus ipsa senectus agit, & œconomiam motuum omnium turbat & impeditam efficit; quin causa per se est, cur homo moriatur.

§. III.

De Senectute autem tractaturis necesse est, ut eam cum Hippocrate Sect. I. aph. 13. in duas periodos dividamus; quarum prima non tanta virium debilitate & naturali imbecillitate secundum ordinarium naturæ cursum laborat; verum viribus adhuc tam animi, quam corporis pollet; altera vero virium tam animi quam corporis successivo decremento vitam molestat; illa viridis seu cruda secundum quosdam appellatur, & ab anno quadragesimo nono ad climactericum magnum numeratur; hæc vero matura seu decrepita dicitur, & ab anno LXIII. ad vitæ terminum pergit. Quo minoribus vero sanitatis incommodis prior, si hac in ætate constituti congruo vitæ victusque regimine sibi ipsis consulant, premitur, eo majoribus pluribus & gravioribus afflictionibus posterior est obnoxia; & si de priori non semper, de posteriori verum perpetuo est Terentii effatum, quod *Senectus ipsa morbus sit.*

Senectus dividitur in duas periodos.

§. IV.

Hæc vero afflictiones, quæ Senectuti ex ætatis vitio sunt propriæ, non solum corpus humanum premunt; verum dispositionem imo causam subinde præbent, quo senectus variis morbosus etiam affectionibus sit exposita.

Quo ordine in tractatione procedamus, ostendimus.

B

Hanc

Hanc itaque materiam hoc modo pertractare nobis visum fuit, ut primo loco recenseamus eas afflictiones, quæ Senectuti ex se & sua natura sunt propriæ; & causas al-
legeimus adæquatas, ex quibus hi effectus non possunt non consequi; secundo de iis affectionibus agemus, quæ præter naturam ætatem senilem infestant & morbos ita di-
ctos senum constituunt; tertio autem therapeutica tracta-
tione vel magis ex Hygiænes fonte depromta ostende-
mus, quomodo ætas senilis a morbis præservari, & quo-
modo a senectutis etiam afflictionibus defendi per aliquot
tempus senes possint. Non vero practicam unius cuius-
que morbi pertractationem tempus & instituti scopus per-
mittunt.

§. V.

*Senectus in-
star morbi a-
git in cor-
pus.*

*Turbat acti-
ones vitales.*

Nunc ordo fert, ut incommoda senectutis, quæ effi-
ciunt, ut ipsa morbus sit, ac sine alia accedente causa
morbofa eam divexant, enumerem. Antequam prolixiori
tractatione id persequar, ostendam in compendio, quod
Senectus omnino morbus sit, & instar morbi in corpus
agat. Nullus enim morbus est, qui non actiones vel vi-
tales, vel naturales, vel animales turbet, pervertat, depri-
mat, impediat. Quod Senectus pari modo in corpus a-
gat, sequentes lineæ docebunt. Primo recensenda sunt
alterationes, quas motibus vitalibus inducit. Circulus
itaque sanguinis vitæ animalis principium in senectute est
impeditior, tardior, ultimato vero plane languidus, hinc
pulsus etiamsi durus sit, tardus tamen percipitur; calor
corporis multum deperditur, vires consumuntur, & deper-
duntur, motus systalticus & diastalticus, qui in omnibus
canalibus viget, peristalticus quoque, & fibrarum etiam
muscu-

musculosarum, elasticus seu tonicus debilitatur, & deperditur.

§. VI.

Transimus ad naturales a Medicis ita dictas functiones, quæ multum etiam in ætate senili depravatæ observantur. Notum est vitam nostram cum sanitate periculis exponi, nisi ingestiones, retentiones & egestiones legitime sint constitutæ. In senectute autem, etiamsi adsit quædam ciborum appetentia, quæ vero sæpe languet, semper tamen multis incommodis laborabit ciborum solutio, digestio, & chyli elaboratio. Secretiones languent; excretiones imminuuntur præprimis, ea quæ fit modo insensibili per cutis colatorium. Potentia generandi deficit. Habitus corporis successive exsiccatur, exarescit, & lento quasi igne depascitur, cutis durior, densior fit, & rugis exaratur. Somnus multum est laboriosus & interruptus, in quibusdam vero nimius nec vires tamen reficiens.

Turbat etiam naturales

§. VII.

Quod de vitalibus & naturalibus dictum est functionibus, id asserendum etiam de animalibus. Nam sensus omnes in senibus vigorem suum amittunt, quorum luculentum exemplum præbent sensus visus & auditus, qui multum in decrepita ætate imminuti deprehenduntur, quin non raro plane aboliuntur. Motus voluntarius etiam difficilius exercetur, quoniam a minimo labore magnum virium experiuntur decrementum. Membra sæpe tremor occupat. Sed ætatis injuriæ non solum corpus humanum & ejus functiones alterant; verum animæ quoque facultates imminuit & alterat. Hinc memoria successive

& animales.

decrescit, ingenii vigor deperditur, & iudicii acies, decus consilienti ætati & in priori senectutis gradu constitutis proprium obstupescit, & vigore suo orbatur. Sunt hæ præcipuæ illæ afflictiones, quas senes ex ætatis vitio sine ullius causæ morbosæ interventu experiuntur, quæ evictum satis dant, quam verum sit dictærium: Senectus ipsa morbus est. Has vero senilis ætatis affectiones eleganti allegoria proponit sacer codex apud Ecclesiast. Cap. ultimo.

§. VIII.

In ætate decrepita hæc eveniunt.

Recensuimus jam, ni fallor, varia & præcipua incommoda, quæ senectuti ex sua natura & ætatis injuria accidunt, quæ in senectute decrepita ordinario observantur. Licet autem quædam subjecta non obnoxia sint his afflictionibus, id minimum veritatem sententiæ, quam hic statuimus, valet infringere; cum accedant tamen ætate appropinquante, nec certum annum, cui propriæ sint hæ ægritudines, assignemus; in ætate enim decrepita hæc observari asseruimus & in hac omnino evenit semper, ut motuum vitalium, naturalium & animalium exercitium sit imminutum, quare necesse est, ut magnis mutationibus sit expositus homo. Pulchre de hac re scribit Seneca in Epist. 28. *Nemo nostrum idem est in senectute, qui fuit juvenis, nemo mane, qui pridie, corpora nostra rapiuntur fluminum more, quicquid vides currit cum tempore, nihil ex his, quæ videmus, manet, ego ipse, dum loquor ista, mutatus sum. Corpus humanum transit ad perfectionem, transit etiam rursus ad interitum.* Cum autem insigne illud veritatum omnium indagandarum principium rationis sufficientis in omni scientia memori semper mente tenendum sit; hinc ad nostram

fram etiam tractationem referendum erit. Cum itaque vi hujus principii nullus motus, nulla mutatio, imo nihil fiat sine ratione sufficiente, hinc nec hæ, quæ in senibus observantur mutationes & alterationes contingunt sine causa, quæ potis est eas producere. Nostrium vero est hanc inquirere, quæ vera est & adæquata, harumque, turbarum rationem sufficientem declarare.

Ratio harum mutationum inquirenda est.

§. IX.

Causa vero mutationum harum non longe requirenda nobis venit, cum in propinquo sit, imo in uniuscujusq; sinu recondita, de qua eleganter Seneca l.c. inquit: *Indita corpori nostro est talis causa, cujus necessitate in viribus augetur, deficit, & etiam interit.* Corporis itaque, fabrica lustranda est ei, qui hoc in genere veras rationes reddere & ætatis vitia explicare allaborat, & quasnam ea mutationes progressu temporis subeat, & quasnam hinc in totam vitæ animalis œconomiam alterationes redundent, attendendæ. Nam hæc alterationem & mutationem ex necessitate subit, dum a variis causis corporeis diversis modis afficitur, & dum ipsa in se mutatur, quam si conspectam habuerimus, rationem quoque, cur corpora senum his afflictionibus sint obnoxia, invenimus.

Quæ in corporis fabrica reperitur.

§. X.

Vbi itaque, causa alleganda est, quæ in senili ætate corporis nostri vires frangit & debilitat; non meliori ratione id fieri posse scio, quam si causam ex solidis medicinæ rationalis principiis inquireamus, quæ vires has producit, & sustentat in corpore sano. Sic enim facili negotio apparebit in defectu hujus causæ sitam esse etiam ra-

*Ex sanitatis
definitione
causæ, quæ
ipsam tur-
bant, facili
negotio in-
veniendæ
sunt.*

tionem, cur hæ cessent. Non meliori via id autem perficere me posse persuasus sum, quam si constitutam habeam veram & adæquatam sanitatis definitionem. Vti enim ex vitæ definitione reali illico status & natura mortis elucescit: ita ex sanitatis definitione omnes, quæ ipsam turbant causæ, & per consequens hæ etiam, quæ senili ætati propriæ semper sunt, afflictiones, legitima connectione possunt deduci. Sanitas autem est vigor omnium functionum corporis nostri, dependens a solidorum convenienti ac moderato motu atque fluidorum legitima mixtione ac debito in omnes corporis partes influxu. Si itaque motus cordis & annexorum vasorum reciprocus systoles & diastoles est æquabilis; si fluidorum mixtio est talis, ut partibus gelatinosis, insipidis, spirituosis & terreis imo aqueis sufficienti in copia & proportionem adæquata sint prædita; si puri sunt humores & ab omnibus heterogeneis eminentibus partibus detectati; si datur liber sanguini per universas corporis partes aditus; si hæc omnia se habent moderate & ad naturæ ordinem: viget sanitas, adsunt vires integræ; quin omnes functiones in corpore fiunt legitime & sufficienter. Contra vero si solidorum motus vel debilior, vel excitatior est, verbo si ab æquilibrio recedit; si humores vel in crasi vel in copia peccant: si fluida non possunt corporis partes singulas subintrare: contrarium evenit, & vita cum sanitate periclitantur.

§. XI.

Ratio reddi- tur, cur ac- tionibus vita- Vnde igitur actiones corporis nostri vitales imminuuntur, cur ætate in senectute deprehenduntur? Ex Physiologia rationali & Mechanica notum est, harum actionum vigorem de-
pen-

pendere non solum a solidorum, per quæ canales, nervos, *les in fene-*
musculos, verbo omnes fibras elasticas intelligimus, con- *Etute sint de-*
venienti constitutione & structura, ita ut hæ nec nimis *pravata.*
flaccidæ, molles sint, nec nimis tensæ, duræ & rigidæ; ve-
rum etiam a sanguinis boni temperati sufficienti in partes
solidas influxu. Non vero hæ duæ causæ sufficiunt ad mo-
tus vitales legitime præstandos, nisi simul accedat fluidi
subtilissimi ætherei naturæ valde elasticæ, quod in cerebri
tubulis secernitur, sufficiens & adæquata copia, & placi-
da ad partes solidas advectio. Si quis sit, qui de cau-
sarum harum efficacia ad motus vitales producendos du-
bitet, is adeat Illustris & Celeberrimi Domini Fr. Hoff-
manni Med. System. Ration. Tom. I. Lib. I. Sect. Cap. III.
de motuum vitalium causis. Cur ego minus huic proba-
tioni immorer, ratio est potissima, quod nihil melius
præstare possem, ac si integra Viri Illustris verba transcri-
berem. Constitutis itaque legitimis actionum vitalium
causis, cur hæ in senio vacillent, ratio reddenda est. Jam
autem experientia docet, fibras corporis nostri successive
indurari, rigidiores fieri, docet eadem, tubulos capillares
& poros collabi & obstrui. Probat id vulgare experi-
mentum, quo carnes juniorum animantium molliores
semper deprehenduntur, quam annosiorum, quod inter
alia Illustris Frid. Hoffmannus Med. System. Ration. Tom.
II. Cap. I. §. 24. in Scholio probavit. Vti id vero in cor-
poris habitu fibroso & musculofo per experientiam cla-
rum est: ita per analogiam non sine ratione de fibris cor-
dis & canalium asseritur, præsertim cum non rara sint ex-
empla, ubi arteriæ aortæ fibræ a cordis exitu vicinæ in
ætate provectoribus in vera ossa degenerari observentur.

Deest

Deest itaque in solidis naturalis & legitima ad motum e-
dendum dispositio, & quoniam ex digestionis vitio & se-
cretionibus ac excretionibus impeditis sanguis alienam
mixtionem & dispositionem induit; ubi etiam ob tubulos
subtilissimos in cerebro collapsos & obstructos fluidum
illud æthereum & elasticum non satis secerni, consequen-
ter nec ad partes vigorandas advehi potest: hinc motus
vitales languent, & Circulus Sanguinis est tardior & im-
peditior. Quare autem pulsus in senibus est tardus? Fit
hoc ob circulum sanguinis tardiozem & languidiorem. Du-
rus autem est ob fibrarum ex quibus arteriæ componun-
tur rigiditatem ac duritiem. Quoniam autem vires in
corpore fiunt a sanguinis & fluidi nervei sufficienti copia,
& naturali crasi, liberoque in partes solidas legitime etiam
constitutas influxu: hinc sublatis in senio his causis ipsæ
vires etiam deficiunt. Et quia circulus sanguinis est lan-
guidus, & vascula in habitu corporis minima, collapsa
ac obstructa: hinc sanguis ad partes externas insufficienti
copia advehi non potest, quare calore etiam debito hæ
partes privantur, & frigida magis observantur. Motus
tonicus sive elasticus fibrarum etiam pendet a solidorum
mobilitate & structura legitima atque a sanguinis & fluidi
nervei sufficienti appulsu. Hæc vero requisita in ætate se-
nili cessare supra docuimus, quare & motus tonicus de-
pravatus in senibus deprehenditur.

§. XII.

*Cur natura-
les actiones
in corpore
senum lan-
guent.*

Pertractatis jam causis, quæ motuum vitalium fun-
ctiones turbant, facili negotio rationes reddendæ erunt,
cur actiones, quas medici naturales appellant, in senibus
multis premantur difficultatibus, imo cur denique plane
cessent,

cessent, quo efficiunt, ut vitales etiam motus brevi aboliantur & vita cum morte commutetur. Est enim machina & fabrica corporis humani ita constructa, atque a Sapientissimo Opifice ordinata, ut omnes in ea partes consentiant, omnes motus conspirent, omnes actiones invicem connexæ sint. Vnde & Hippocr. Lib. de alimentis §. 4. dicit: *Confluxio una, conspiratio una & consentientia omnia.* Hac sancitum est harmonia, ut motus naturales dependeant a vitalibus, sed & vice versa alteratis motibus naturalibus ipsæ etiam actiones vitales non rite in corpore administrantur. Luculentum hujus rei exemplum se offert in iis, qui ictero laborant, in his una motuum naturalium species male est affecta, dum secretio bilis in hepate non fit, & sublata est; quam varia tamen & gravia ex hac secretionem impedita in corpus redundant incommoda, iis satis cognitum est, qui aliquem ictero laborantem viderunt. Contra etiam sublati ad tempus motibus vitalibus, omnes in corpore actiones, ergo & naturales cessant. Cum itaque in senibus illæ depravatæ deprehendantur, conclusione facili elicimus has quoque a naturali suo statu deflectere.

§. XIII.

Cur itaque in senectute proveciori constitutis appetitus est depravatus? Fit id ob robur stomachi dejectum, quod in causa est, cur iste multis eminentibus impuritatibus viscidis, mucidis ac biliosis sit obsessus, quæ appetentiæ debitæ sunt infensissimi hostes. Sæpe vero gravior subest causa, sed magis etiam formidolosa. Non raro enim evenit ut in senectute decrepita non secus ac in morbis chronicis viscus quoddam & ut plurimum

Cur speciatim vacillet appetitus.

lien abeat in corruptionem, & tum omnis perit appetitus, estque hoc symptoma tam in prædictis morbis, quam in senibus a tali causa ortum mortis non multo post venturæ securum indicium. Interdum vero, si acidis & ponticis humoribus prima regio sit referta, nimium est valens apperitus, quod in his etiam contingit, qui malo hypochondriaco sunt obnoxii. Vitiatus appetitus alimentorum subactionem etiam depravatam indicat, quare vero ciborum solutio & digestio vacillet, videndum. Ad alimenta solvenda requiritur stomachi & intestinorum sufficiens robur, requiritur ad hunc usum etiam liquoris salivæ naturæ valde fermentantis, neque minus liquoris gastrici & pancreatici ac biliosi sufficiens copia & satis apta ad solvendam ciborum massam mixtio, non excluso potu etiam sufficienti. Sed quia in ætate provectioribus ob vires totius corporis labascentes ipsius quoque stomachi & intestinorum robur est dejectum, quoniam ob collapsos, quin obstructos tubulos subtilissimos in glandulis quæ secretioni salivæ, & succi pancreatici dicatæ sunt, liquorum horum copia sufficiens deficit quoniam ob hepatis idem vitium bilis adæquata copia ut & ob induratos minimos acinos glandulosos liquor in ventriculo secerendus deest, ipsa etiam ciborum concoctio depravata sit, est necesse. Ex digestionem vero his de causis vitiata chylus etiam impurus, minus spirituosus elicitur, quare & sanguinis spirituascentia debita deficit.

*Cur secretion-
es & excre-
tiones immi-
nutæ & de-
pravatæ sint.*

§. XIV.

Quod secretiones in senibus sint imminutæ, diximus, §. etiam proxime præcedenti brevibus, cur id contingat, attigimus. Fit autem istud, quoniam & organa secreto-

cretoria & humores secernendi a naturali sua constitutione deflectunt. Omnis enim secretio requirit organi, in quo ipsa fit, legitimam dispositionem, quæ est ut canales, in quos impelluntur fluida, sint sufficienti robore ad humores regendos præditi, sint etiam sufficienter patuli ut humor eos ingredi possit; requirit etiam fluidorum mixturem & consistentiam debitam. Sed in senectute partes omnes tono suo dejiciuntur, ergo & organa secretoria; tubuli & canales minutissimi in toto corpore coeunt obstitantur, occluduntur, ergo & in organis secretoriis; humores, quia tardius moventur & multis impuritatibus contaminantur, etiam a naturali sua schesi deflectunt; hinc secretionem per totum corpus imminuuntur. Hæc est causa, cur in senibus liquidi nervei secretio deficiat, cur liquidi subtilissimi seminalis secretio deficiens & sublata potentiam generandi tollat, cur secretio salivæ, succi pancreatici, bilis, imo muci in intestinis etiam sit impeditior. Excretionem etiam his de causis sufflamantur. Quoniam enim tubuli & pori in cortice corporis constituti minutissimi angustantur & obturantur, humorem transmittere nequeunt, hinc transpiratio insensibilis depravatur. Alvina excretio tardior est in senibus, quia intestina tono debiliore sunt instructa & quia lympa mucosa in intestinorum glandulis secernenda propter obstructos & induratos subtilissimos acinos glandulosos deficit, quæ lubricationi fecum aridarum inservit; hinc etiam excrementa duriora semper conspiciuntur. Ob chylum autem & sanguinem impurum, ob tubulos & canaliculos minutissimos obstructos & angustatos cessat nutritio corporis; hinc habitus corporis exarescit, pinguedo absumitur,

tur, & corpus macie conficitur. Cum itaque coeuntibus vasculis minimis humorum appulsio abolita sit, cum pinguedine absumpta etiam cesset causa, quæ ipsam cutim in debita distensione contineat: hinc ipsa, ceu corpus elasticum sese contrahit, & sic in facie & habitu corporis rugæ producuntur. Somnus vero senum inquietus est, quia ob angustatos & obstructos tubulos ac porulos cerebri subtilissimos lymphæ illa tenuis, roscida, quæ cerebri & nervorum tubulis sese insinuans liquidi nervei influxum aliquo modo languidiorem efficit, & sic somnum producit, secerni adeoque, prædictis porulis sese insinuare nequit. Si vero propter humorum motum lentiores & impeditum sero crassiori, viscidiori meatus, quos jam diximus, obstipantur, somnus est quidem nimis, & affectus soporosi velut æmulus, sed ob impeditam & paucam fluidi illius ætherei, elastici secretionem vires nullum percipiunt augmentum, cum præsertim ipsius etiam sanguinis massa impura & variis sordibus inquinata sit, & impuritas sanguinis virium lapsum semper producat.

§. XV.

Cur actiones, quæ animales dicuntur etiam in senibus deficient.

Cur actiones animales in senibus multum vacillent, id facili negotio, ex iis repetendum venit, quæ de vitalium & naturalium functionum defectu in causali pertractatione dicta sunt. Nam quod ad sensus attinet, ii requirunt membranarum & fibrillarum nervearum, quæ genuina sunt omnium sensationum sedes, debitam tensionem & expansionem, debitam etiam flexibilitatem & fluidi nervei imo sanguinis subtilis sufficientem influxum. Si vero prædictæ hæ membranæ, vel nimis relaxantur; vel nimis tenduntur, vel nimis condensantur & indurantur, sensatio

tio quoque in priori & poſteriori, caſu deperditur, quod etiam accidit, ſi liquidi nervei, vel ſanguinis adæquati influxus ſiſtitur, & prædictæ hæ partes ſero mucido & lymphæ viſcoſa tenaci imbuuntur; in ſecundo vero caſu ubi ſcilicet partes nerveæ ultra naturalem tonum expanduntur & diſtenduntur, ſenſatio nimis aucta triſtis & dolorifica producitur. Ex his præmiſſis facili negotio cur in ſenibus ſenſus depraventur, apparet; fibrillulæ enim nerveæ & indurantur, & a tono dejiciuntur, & ſanguinis ſinceri & liquidi ſubtiliſſimi influxu orbantur, & materia ſeroſa tenaci obſtruuntur, quod pro differentia ſubjectorum in iis ſenſus tollit. Nam ubicunque ſenſus depravati & imminuti obſervantur, una cauſarum harum ſemper deprehendetur, quod ex individui cujuſque examine patebit. Motus autem voluntarius in ſenibus his de cauſis non eſt tam facilis & expeditus: dum vires ipſorum vacillant & imminutæ ſunt, dum ſanguis minus purus & ſpirituoſus in venis alitur, dum ob anguſtatos & obſtructos canales minutiffimos & ſanguinis & liquidi nervei appuſſus intercipitur, dum muſculorum fibrillulæ duriores & ad motum edendum ineptiores redduntur, & partes omnes debito tono orbantur, qui tonus partium muſculoſarum vicioſus & irregularis in cauſa etiam eſt, cur membra tremore in multis corripiantur.

§. XVI.

His pertractatis quæſtio exſurgit, cur in ſenibus decrepitis poſtremo eveniat, ut actiones etiam illæ, quæ a mente, ſeu anima rationali in nobis produciuntur alterationes ſubeant & immutentur, ac interdum plane aboleantur, de quo Virgilius in Eclogis inquit: *Omnia fert ætas*

Cur facultates animæ etiam in ſenibus vigore ſuo orbentur.

animum quoque, & quod causam dedit vulgari proverbio: Senes bis pueri sunt. Jam vero fateor, difficilem videri ad factam hanc quæstionem responsionem cum omnium Philoſophorum consensu nec spiritus in corpus, nec corpus vice versa in spiritum agere possit. Hinc alterato corpore, & per ætatis injuriam depravatis ipsius functionibus, ex nulla necessitate animæ functiones imminui quispiam asseret. Verum enim vero attendenda est lex illa & harmonia, quæ ab omnipotenti Creatore in corpore humano stabilita est, dum corpori ad motus edendos artificiosissime constructo spiritum seu animam rationalem uniret, ut ex hisce nos expediamus difficultatibus. Hac lege sanctum est ut immutatis & depravatis corporis actionibus in ipso etiam spiritu turbæ ac anomalix exoriantur. Eadem lege fit, ut turbato & præter naturam affecto spiritu illico turbæ in corporis actionibus oboriantur. Hoc satis demonstratum dant animi pathemata vitæ & sanitati insensissima; illud maniacy, melancholici, vino madidi confirmant. Si vero omnia in corpore fiunt placide & moderate, verbo si corpus sanum est, animi etiam facultates vigent, & legitime exercentur. Contrarium evenit, si actiones corporis a naturali regula deflectunt. Quoniam itaque, quod in superioribus deductum fuit, in senibus circulus sanguinis per totum corpus est languidus & impeditus, non secus in cerebro etiam variis premitur difficultatibus; quoniam etiam impurus & minus spirituosus in ætate decrepita observatur; ad sanitatem vero tam animæ quam corporis circulus sanguinis liber & humores puri blandi requirantur: mirum non est, si in senibus circulus sanguinis propter obstructos tubulos cere-

cerebri subtilissimos sit impeditus, & si præterea adhuc sanguis impurus minus spirituosus animæ facultates impediatur & imminuat. Cognovit id suo jam tempore Hippocr. qui Lib. de flatibus §. 20. ait: *Opinor inter omnia, quæ in corpore sunt, nihil magis ad prudentiam conferre, quam sanguinem, qui ergo cum inconstanti habitu persistit, consistit etiam prudentia; sanguine vero permutato concidit etiam prudentia.* Idem gravissimus Autor Lib. I. de diæta inquit: *Si sanum fuerit corpus, & non a morbis perturbetur, animæ quoque temperamentum sapiens existit.* Requiritur vero circulus sanguinis per cerebrum liber & moderatus, sanguis etiam blandus, temperatus, sed spirituosus, quoniam his præsentibus in corpore liquidum illud æthereæ naturæ subtilissimum sufficienti in copia secernitur, quod ad animi functiones legitime obeundas non minus, quam ad vitale negotium est necessarium.

§. XVII.

Vidimus jam incommoda senectutis, quæ ex ætatis vitio corpus variis modis affligunt, & alterant sine causæ ullius morbosæ & præter naturalis concursu; his vero incommodis quidam senum magis, alii minus laborant. Adeoque dubium forte quis movebit, quod non omnes senum istis, quæ ex senectutis vitio in corpus redundare diximus, afflictionibus sint obnoxii; hinc minus verum esse assertum, quod senectutem morbum esse pronunciat. Sed facilis est modus, quo huic objectioni obviam ire possumus. Id equidem ultro largior, non omnes eos, qui in senio constituti sunt, senectutis injuriis ab ipso statim puncto, quo L. annum confecerunt, expositos esse; verum multi valetudine satis fruuntur alacri, etsi LX. annum

Objection quædam refellitur.

num prætergressi fuerint. Ex superioribus autem repetendum censeo, quod senectutem §. 3. in duas distinctas periodos dividerimus. unde patebit etiam, quod prima seu viridis ætas minime his exposita sit injuriis; nam in ea constituti viribus tam animi, quam corporis pollent adhuc; posterior vero decrepita, quæ ad finem usque vitæ numeratur, nunquam his, quæ recensuimus, carebit incommodis. Neque vero hic dubitamus, quin natura robusta & vegeta accedente congruo in rebus non naturalibus usu, senectutis has afflictiones per aliquod tempus a corpore removeare possit, id quod in tertio Tractationis membro, ubi de præservatione harum afflictionum agitur, apparebit.

§. XVIII.

*Transitus ad
alteram tra-
ctationis
partem.*

*Cur morbos
senum speci-
atim pertra-
ctem.*

His jam absolutis transeundum est ad alteram Dissertationis nostræ partem, in qua consideraturi sumus eas afflictiones, quæ inter morbos senum a medicis referuntur, & præter ea, quæ pertractavimus incommoda, senilem ætatem sæpe graviter divexant. Antequam vero pathologicam pertractationem afflictionum morbosarum, quæ senibus propriæ sunt, & ex corporis functionibus per ætatem vitiatas in senes redundant, aggrediar, e re fore arbitror, ut ostendam, cur morbos speciatim pertractaverim, & ab afflictionibus, quas ætas corpori infert, separaverim. Nam & hæ affectiones tres motuum species, quæ in omni sunt homine alterant & turbant, & in quibusdam etiam subjectis nonnunquam motuum horum exercitium valde impeditum efficiunt, & etiam ex ætatis vitio homines affligunt. Verum his inductus sum rationibus, ut morbos senum seorsim pertractarem quæ hic sequuntur: Illa, quæ
supra

supra tradidi, incommoda, in nulla alia ætate, quam in senili reperiuntur, præsertim ita, uti senectutem infestant, unita, vel si in illis accidunt quædam, inter morbos incongruos referuntur, senii vero ordinarii sunt comites; deinde potest præservari senectus a morbis senum ita dictis, ne per totum vitæ spatium ipsis corripatur; nulla vero arte pathemata supra tradita ab ætate decrepita, ne unquam ipsam invadant, possunt abarceri, multi denique senum diem suum obeunt, antequam ulla morborum horum specie laboraverint, secus se res habet cum afflictionibus ex ætatis vitio ætati provectæ propriis. Quod vero etiam hi morbi ex ætatis injuria corpori ingenerentur, largior quidem in tantum, quatenus ætas causam mediatam constituit, dum scilicet corpori talis dispositio ingeneratur, quæ concurrentibus aliis etiam circumstantiis, morbos hos producere potest; minime vero ætas causa per se est, quo hi morbi senilia corpora impetant.

§. XIX.

Ad specialem jam morborum pertractationem ubi *Causæ mor-*
 transeundum est, monemus, nos de iis morbis etiam a- *borum gene-*
 cturos, qui senectuti viridi sunt infesti, & de istis, qui de- *rales præ-*
 crepitam invadunt. Ubi autem id acturi sumus, visum *mittuntur*
 est inquirere primo loco an causæ morborum generales *speciatim*
 in senibus deprehendantur; nam hoc comperto facili ne- *Plethora.*
 gotio reliquorum morborum genesis venit deducenda.
 Duæ potissimum causæ morborum generales a medicis
 statuuntur, quarum altera Plethora, altera Cacochymia
 appellatur. Plethora dicitur ea sanguinis abundantia
 quæ major est, quam ut a vasis sufficienter regi & cir-
 cumagi

cumagi poſſit. Hæc in corpore ſenili variis de cauſis producitur. Non omnes enim ſenum ſunt, quorum appetitus eſt dejectus, verum quidam ſatis adhuc appetunt. Ubi itaque cibos nutrientes, copioſa gelatina præditos ingerunt, ubi potibus quoque nutrientibus utuntur, ubi motu voluntario corpus non ſatis exercetur, qui utile valde eſt auxilium ad humores abundantes conſumendos, ubi excretiones tam peripherica, quam ſanguinis etiam conſuetæ, imminuuntur, nec ſanguis per venam educitur ſacili negotio plethora his conſpirantibus cauſis in ſenibus producitur, quæ variis morboſis afflictionibus cauſam ſubminiſtrat.

§. XX.

*Qui morbi
ex plethora
oriundi ſe-
nes diſcedent.*

Ex Plethora itaque in ſenili corpore deprehenſa quænam morborum ſpecies conſequantur, videbimus. Membra primum gravitate & laſſitudine premuntur, quæ provenit a ſanguine nimio elateri ſolidorum renitente & adequatam eorum contractionem impediante. Fit ex hoc, ut multis in locis ſanguis ſtagnet, quod præſertim fit in iis, ubi ſanguis ordinario tardius movetur, qualia ſunt in abdomine potiffimum & ſpeciatiim in vasis, quæ ad venam portæ ſanguinem revehunt. Nullibi vero ſacilius id contingit, quam in his, quæ ſanguinem ab inteſtinis præſertim colo & recto per V. P. ad hepar revehunt. Nam vaſa hæc venoſa perpendiculararem legunt ferme viam, dum ſanguinem trunco, a quo naſcuntur, infundunt, & deſunt adminicula, de quibus aliis venis natura proſpexit. Si itaque circuitus ſanguinis per hepar eſt impeditior, ut V.P. ſanguine ſe præmte exonerare non poſſit, ſtagnat facillime in vena, quæ ex inferiori abdominis & inteſtinorum regione adductum cruorem ad truncum ſuum vehit, &

in ea , quæ ex liene receptum sanguinem in hepar ducit. Quod si vero in priori casu sanguis in vena subsistat quasi, & stagnet: tum impedit, quo minus ex arteriis accedens in venam concedere possit, & cum a tergo arteriæ sanguinem adducere non desinant, fit vasorum distensio & dilaceratio, quam deniq; cruoris sinceri fluxus consequitur, qui contingit in intestino recto & hæmorrhoidalis nominatur. Hic autem in senibus ideo potissimum ut plurimum contingit, *Hæmorrhoides dum genesis.* quoniam difficilius fere sanguis per viscera movetur, & quia motui voluntario parcunt, quo magis adhuc sanguinis iter per viscera impeditur. Quamdiu autem hic dictus fluxus hæmorrhoidalis legitime fit, insigne est naturæ bene valentis opus, ceu a Solenandro Conf. 20. Sect. 4. tanquam salutare naturæ opus extollitur de quo Julius Cæsar Claudinus Consil. 20. asserit, quod *hæmorrhoides fluentes sint auxilium pro longa sanitate, & a multis morbis præservent*, nam corpus sanguine nimio deplet, & plus quam V.S. in dispositis proficit, dum sanguinem e loco, ubi morbos parare posset, proxime educit. Sed periculosus est hospes, & latet omnino an *Suppresse hæmorrhoides quid causentur.* sanguis in herba. Si enim subsistit, truculentos spasmos, stagnationes, infarctus viscerum, intestini recti exulcerationes, colicam convulsivam, quæ hæmorrhoidalis dicitur, producit, vel mictum cruentum generat, quod levissime & sæpissime in senibus contingit, quorum hæmorrhoides anomalis motibus sunt obnoxii, uti morbi ex hæmorrhoidum anomaliis fusi ab Excell. Dn. Alberti sunt recensiti, qui hoc negotium in Tract. de Hæmorrh. pertractavit, & multis observationibus ex Autoribus tam antiquioribus, quam recentioribus collectis comprobavit.

§. XXI.

*Quomodo
Cacochymia
in senibus
generetur.*

Plethoram & morbos, qui ex ea corpus adoriuntur, breviter vidimus, nunc opus est, ut Cacochymiae productionem consideremus. Hujus origo derivatur potissimum ex tribus causis: si vel viscera, per quæ speciatim hic hepar & lienem intelligo, in functionibus suis languent, & sanguine crasso copioso infarcta sunt, vel quod adhuc pejus plane indurata, scirrhusa; vel si digestionis vitium variis mucidis sordibus chylum inquinat; vel si secretionis utilium ab inutilibus, & horum excretionibus languent. At vero in senili corpore secretiones cum excretionibus impeditas & digestionem vitiosam esse, supra tradidimus; in senili corpore circulum sanguinis per viscera & abdomen ordinario languere, & attenta observatio, & sana ratio abunde docet, quin ipsa nimia sanguinis in corpore copia cacochymiae causa sæpe fit. Non vero solum in vasis vitiosos humores alunt senes, verum in prima etiam regione, quæ ciborum solutioni & digestionem dicata est, variae sordes mucidæ, biliosæ, acidæ stabulantur, quæ omnes ex eo, quod digestio in senibus est impedita & difficilis, in corpore generantur.

§. XXII.

Morbi ex cacochymia oriundi.

His vero de causis, quod impuri humores in venis & prima regione stabulantur, varii senum morbi resultant. Quodsi enim vitiatis sic humoribus & impuritatibus salino biliosis & tartareis inquinatis accedat ulterior perspirationis suppressio, quod variis de causis contingere solet, & facillime si sola aura frigidiuscula ad corpus admittatur; tum subito ferossæ defluxiones partes infestant, & rheumatismorum parata est genesis; huic enim causæ
nata-

natales debent coryzæ, gravedines, odontalgia quoque sæpius, imo non raro tusses, raucedines & catarrhi. Si in articulorum partes nerveas & sensibiles vitiosum impurum serum delabatur, articulorum dolores oriuntur; si vero ad ductus urinarios renes & vesicam feri tartarei, impuri lecessio fiat, varii producuntur spasmi, si enim urethram & sphincterem, imo ipsius vesicæ membranas valde sensibiles, salinæ acres hæ partes laceissent oriuntur inanes sed dolorifici ad mingendum stimuli, stranguriæ, imo vesicæ sæpe arrosiones, quod ex moleculis urinæ instar furfuris innatantibus comparet. Si vero materia tartarea crassior, cum mucidis partibus in vesica combineatur, excluditur calculus. Quando autem perspiratione impedita salini acres humores in corpore accumulati ad intestinorum devolvuntur compagem, & in ipsis intestinis continentur impuritates & inquinamenta varia, tum spasmodicæ intestinorum affectiones, diarrhœæ, lienterix & passionēs coeliacæ proveniunt. Huic impuritati sanguinis insigni debentur etiam pruritus cutis, exulcerationes & difficiles partium læsarum consolidationes. In oculis vitiosi acres humores producunt lippitudines & graves alios oculorum morbos. Hos morbos totidem fere verbis recenset Hip. aph. Sect. III. *Senibus autem inquit talia contingunt: Spirandi difficultates, & defluxiones cum tussi, urinæ stillicidia, urinæ difficultates, articulorum dolores, nephritides, vertigines, siderationes, mali habitus, pruritus totius corporis, vigiliæ, alvi, oculorum & narium humiditates, visus hebetudines, glaucedines, auditus gravitates.* Et Celsus Lib. II. Cap. I. ita habet. *In senectute spiritus & urinæ difficultas, gravedo, articulorum & re-*

num dolores, nervorum resolutiones, malus corporis habitus cachexiam græce appellant, nocturnæ vigiliæ, vitia longiora aurium, præcipueque solata alvus, & quæ sequuntur hanc tormina, vel levitas intestinorum, cæteraque fusi ventris mala.

§. XXIII.

*Mortis ex
ætatis vitio
generatio*

Si vero in crescentibus ulterius successu temporis sanguinis impuritibus & coeuntibus vasculis minimis vires deficiunt, imo plane prosternuntur, dum causæ a quibus fiunt, evertuntur, sanguinis motus qui antea fuerat tardus & impeditus jam evadit debilis & languidus. Et quia ad habitum corporis non satis propelli potest, ad vasa majora & nobiliora fertur, propulsus vero ex his nullibi difficillius, quam per abdominis viscera movetur, in quibus etiam tandem plane stagnat & in liene ut plurimum subsistens impedit, quo minus is, quem vasa breviora ex ventriculo recipiunt, ad lienem ferri possit; dum vero in ventriculi tunicis impactus manet sanguis, abit in sphaecelofam corruptionem, in liene vero pariter producit putredinem, hinc fit, ut, si senio confectos post mortem intueamur, lien ita corruptus sit, ut digitis dirimi & perforari possit. Hæc est causa mortis reperiunda in omnibus, qui ob proVectam valde ætatem moriuntur, & mortis venturæ nuncius est appetitus & virium plenarius lapsus. Si vero viscera ante minus salva in senibus in corruptionem ulcerosam fatiscant, exoritur febris hectica quæ hac in ætate aliud nomen accipit, & marasmus senilis appellatur.

§. XXIV.

Cum autem tractatio nostra Medica sit: non sufficit nosse tantummodo afflictiones, quæ senibus ex natura corporis mutata, & per senium alterata sunt intesta, non sufficit etiam nosse morbos, qui ex hac dispositione in corpus irruunt; verum opus est ut medice tractaturi medicam subjungamus considerationem. Et quia curam unius cujusque affectus, de quibus hic sermonem institimus, tradere est opus, quod Dissertationis limites longe excedit: satis facturum me titulo tractationi huic præfixo reor, si ex fonte diætetico consilia & auxilia depromam, quæ omnes senum afflictiones abigere per aliquod tempus possunt, & a morte, si non præservant, præservant tamen a tempestitiva & immatura. Sed putabit quispiam frustra hæc ad vitam incolumem magis & longiorum tradi adminicula, cum secundum Tralliani effatum, quod Lib. XII. de marasmo habet. *Senium nulla medicina tolli possit*, quam in rem erudite Cel. Verulamius loco supra citato ita differit: *Hæc intestina illa calamitas, quam nulla ars, nulla humana industria effugere, imo ne reprimere quidem possit. Etenim si cui ab ortu temperato vel ipse Aesculapius præsit, qui illum ab iis, quæ foris sunt, aut quæ intro sumuntur, saluum & incolumem sic tueatur, ut nullum corpus inde derimentum capiat, is tamen a semet ipso, suaque sponte magis conficietur, consumeturque donec extremum vitæ spiritum edat.* Verum enimvero dictitat id sana ratio, & attenta indies confirmat experientia, quod ii, qui naturam nacti sunt robustam nec violento velut modo per varios in rebus non naturalibus excessus eas prostraverunt, diutius vivant præ iis, qui corpore sunt valde

An possit senectus ab ægritudinibus præservari.

valde debiles; eadem docet experientia debili etiam constitutione præditos, si diæteticiis præceptis obtemperent, diutius vivere, quam si robusti quidem fuerint, sed nimium viribus fidendo per abusus, in diæta victusque regimine insignes corpus debile reddiderint. Rationi quam optime consentaneum est, in tempore remotis impedimentis sanitatem ulterius conservari posse, quam si nihil sit, quod morborum generationem impediatur, nec novum forte in medicina dogma est, quod præcipit, ut defectus naturæ ars suppleat. Ex his itaque præmissis concludimus non inutile opus suscepturos nos esse, si remedia pro senectute incolumi ducenda & morbis a corpore proteclandis suppeditemus.

§. XXV.

Si itaque in artis potestate situm est, ut præservet corpus per aliquod tempus a senectutis incommodis, & a morbis, qui ex senum dispositione ipsis insultant: videndum merito est, quibus auxiliis impetrare id possimus. Naturæ humanæ sapientissimus artifex nobis, quid sequendum sit præscripsit, dum machinam nostram ita coordinavit, ut circulus sanguinis præservet corpus ab omnibus ægritudinibus, & in sanitate, si liber & æqualis per totum corpus fuerit, conservet. Ex hoc itaque fonte depromemus omnia consilia & auxilia, quæ in præsentiarum præscribentur. Primum quippe præceptum diæteticum nostrum erit, ut circulum sanguinis per totum corpus liberum & æquabilem præstemus; alterum quod ex hoc legitime constituto necessario consequitur, est secretionum & excretionum incolumitas; tertium est novorum humorum sed congruorum in corpore generatio.

*Tres regulæ,
quæ corpus
sanum con-
servant.*

§. XXVI.

§. XXVI.

Qua ratione motus sanguinis circularis per corpus universum salvus & incolumis fit conservandus, res est dictu facillima, sed ubi præstandum est & in corpore sanguinis iter liberum & æquabile reddendum, pluribus obruta difficultatibus. Manet quippe sanguis in legitimo & naturali suo motu, si solidorum motus est moderatus & temperatus; si vascula & ductuli minimi sunt aperti, ut humorem appulsum recipere possint, si solidorum robur est par movendo sanguini, & si humores adæquatam habent consistentiam, spirituaſcentiam & si copia nec excedunt, nec deficiunt. Si viget circulus sanguinis, valent etiam omnes functiones in corpore, ergo & se- ac excretiones. Si autem tam circuitus sanguinis, quam se- & excretiones per totum corpus legitime fiunt; necessario humores consumuntur, & alienam indolem induunt; quare necesse est, ut ad sanitatem & vitam conservandam novi humores corpori ingenerentur blandi ac temperati, & partibus spirituosius sufficienter instructi. Non meliori igitur via procedere me posse arbitror, quam, ut tritam *In diæta se-* illam sex rerum non-naturalium classem pertractando, *num ordi-* quid ex his senibus profit, vel noceat, ostendam. Si e- *nanda sex res* nim harum observatio fit accurata, tria supra tradita sani- *n.n. pertra-* tatis conservandæ fundamenta vigent, & corpus in sano *stantur.* statu conservant.

§. XXVII.

Hoc ordine acturis primo loco sese offert *Aër.* Est *Qualis aër* iste vitæ illud pabulum, quo intercepto tollitur respiratio, *senibus con-* & vita cessat. Non sufficit vero tantum, ut senes aère *ducat.* libero gaudeant, verum, cum iple aër variis mutationibus sit obnoxius, quas illico in corpus nostrum transfert,

et re est videre, quinam aer pro senum sanitate sit potissimum commendandus. Aer purus, serenus temperatus est insigne ad incolumitatem imo ad longævitatē auxiliū; quamobrem in senibus etiam hauriendus est. Nam aer, qui multis impuris exhalationibus inquinatus est, promptam morborum causam suppeditat. Testantur de aeris salubritate loca montosa, elatiora, in quibus aer purior & serenior, temperatus tamen hauritur, horum incolæ multo vegetiores & alacriores observantur, quam ubi paludes & stagna reperiuntur. Eligendus etiam est aer temperatus, nec minus frigidus, neque vero excessive calidus; nam ille impeditam transpirationem magis adhuc sufflammat; hic vero nimias ebullitiones in sanguine excitat, viribusque est inimicus. Moderate autem calidus pororum apertioni, & perspirationis successui multum verificatur. Hac de causa Celsus Lib. II. Cap. I. *Senes æstate optime valere, & quod hyems ipsis inimicior sit* pronunciat, quoniam in illa excretio cuticularis promovetur, in hac supprimitur. Conclavia etiam habitanda senibus aere sereno & temperato, quoad fieri potest, sint referta, & contra aeris vicissitudines corpus probe vestimentiis contegendum. Inimicus vero omnibus ætatibus, sed præsertim senili est impuris, tetrus, vappidus exhalationibus inquinatus aer, nimis frigidus, vel æstuosus, nebulosus, pluviosus, inimicæ etiam subitæ acris mutationes.

§. XXVIII.

Quæ circa cibum tenenda sint.

De cibo & potu hæc tenenda sunt. Alimenta semper exigunt exquisitam ad vires stomachi imo totius corporis relationem tam ratione copię, quam substantiæ. Cum igitur in senectute viridi constituti satis adhuc viribus valeant, tum non opus habent, ut tam stricte legibus dieteticis

ticis hoc in genere se adstringant; suadenda tamen magis est mediocritas. Senes vero decrepiti, naturæ debilioris accuratiori diætæ ratione utantur oportet. In genere autem cibi mollioris & ad solvendum aptioris substantiæ sunt præferendi durioribus, viscidioribus, compactioribus. Consulimus itaque ex animantibus junioribus depromtas carnes, juscula, gelatinas, item ova sed sorbilia, ex lacte parata juscula, sed ne adsit acidum in ventriculo copiosum. Ex fluviatilibus pisces, quorum carnes sunt duriores, nec in mucosam pulvem desciscunt, & qui in fluviis, non vero stagnis vivunt, cancos etiam fluviatiles, sed ne ventriculus nimium sit debilis & impuritatibus obfusus suademus. Ex vegetabilibus conducunt, quæ oleum subtile in se recondunt, qualia sunt semina, sed remotis, quæ una cum oleo multum viscosi crassioris principii in se continent. Ex oleribus & fructibus, quæ facile coctioni obtemperant & vim lenem medicam habent, laudantur, sunt talia; herba & radix petroselinii, siferis, nasturtii species, acetosa, passulæ, pruna &c. Carnes vero infumatæ & salitæ non nimis sunt reformidandæ, si ventriculus adhuc officio suo fungitur, & si assuetum iis sit subjectum, sed non peccent copia, nec frequentius ingerantur. Generalis enim est regula, & senibus quam maxime observanda quam ex Celso didicimus: Lib. I. Cap. II. *ubi ad cibum ventum est, nunquam utilis est nimia satietas.* In assumptione etiam alimentorum hic ordo tenendus est, quod in prandio durioris substantiæ alimenta, major etiam portio ingeri possit; in coena autem juscula & mollioris substantiæ parciori in copia, sic ventriculo & digestioni magis consulti- tur, sic somnus etiam est placidior. Ab his autem alimentis senes abstineant, quæ multas in primis viis relinquunt cruditates, quæ ægrius solvuntur, & ventriculum gravant, quæ

in flatus facile explicantur, quæ facile fermentant, & alvi obstructionem promte inducunt. Sunt talia: carnes induratæ, pisces præsertim marini exsiccati; farinacea, pisa, lentes, fabæ, legumina crassiora; mellita, sacharata, fructus horræi, melones, cucumeres; fructus adstringentes, mala cydonia, & cætera ex vegetabilum familia austero vel acerbo sapore prædita. Aromata vero & quæ cum alimentis misceri solent ad ventriculum roborandum & stimulandum ut sunt: Zedoaria, r. armoraciæ, porrorum & allii species in convenienti proportionem, nec nimis frequenter assumpta usum habent insignissimum.

§. XXIX.

*Quid circa
potulenta ob-
servandum.*

Inter potulenta ea sunt saluberrima, quæ puriora sunt & leviora. Laudem itaque præ omnibus meretur aqua simplex, sed pura, levis, & subtilis. Nam præbet menstruum subtilissimum, quod poros ciborum penetrat, ac intime recludit, & chyli boni generationi valde velificatur. Est præterea potus, qui cum omnibus alimentis sumi potest, ac semper innoxius; nec solum diæteticè usurpari potest, verum medicinam etiam præbet valde efficacem, ubi obstructi canales expediendi sunt, & fluiditas languini concilianda, quod pro more suo solide evictum dedit Illustris ac Cel. Dn. Fr. Hoffmannus in Dissertat. de aqua medicina universalis. Si vero ventriculi debilitati consulendum, egregie juvat eam cum vini adulti, generosi parte dimidia, vel tertia miscere atque sic in usum ducere. Ex cerevisiis subtiliores eligimus, rejectis valde lupulatis, crassis & nimis pinguibus, item quæ flatulentias causantur. Vinum vero lac senum dictum ita usurpandum, ut vires erigat, non autem in tanta copia,

ut

ut eas prosternat. Præstat medicamento loco eo uti, in moderata proportione, ita enim chylo spirituacescentiam ingenerat, ventriculum firmat, & C.S. promovet. Eligenda autem sunt ea, quæ magis sunt adulta, generosa, pura & spirituosæ; rejicimus ignobiliora, recentia, quæ acida sunt, & multum terræ calcareæ in sinu recondunt. Quod ad potus reliquos spirituosos & spiritus ardentis attinet, eorum usum plane improbamus, nisi in vini defectu quando cibi duriores, compactiores ventriculum gravant, ad digestionem facilitandam, sed ingesto prius potu tenui sufficienti, assumantur. Nam viscerum indurationes & infarctus producant. Potus Thée & Coffée in se non nocent, imo, quod priorem præsertim attinet prodest, saltem cavendum ne nimium sint saturati, nec saccharo nimium edulcorati. Succolada autem cum lacte cocta plus nocet, quam prodest; cum aqua vero cocta additis congruis aromatibus magis prodest, cum vino frustra coquitur, nam sub coctione partes spirituosæ avolant, præstat igitur post coctionem cum aqua tantillum vini generosi addere.

§. XXX.

Tertio loco circa *motum & quietem* pauca præscribenda sunt. Motus nimius nocet, nocet etiam quies nimia; quare moderamen hic quam maxime suademus. Ea autem motus species eligenda est, quæ corpori pro sui constitutione maxime est conveniens, ut debilibus debiliorem, valentioribus autem fortio rem motum præcipiamus. Ex omnibus speciebus vecturam & equitationem, utpote sub qua sanguini iter facilius per partes abdominis conciliatur. Deambulatio etiam in plano ad

Motus & quietis consideratio.

moderatam usque diaphnoen instituta multum prodest; neque minus lectio vel locutio voce altiori facta juvat, quam Hippocr. a cœna si instituatur, multum laudat in Lib. III. de diæta inquiring: *vocis exercitatio a cœna valde commoda est.* De omnibus motuum speciebus tenendum, quod sub aere sereno & temperato sint instituenda, & digestionem absoluta ac ventriculo vacuo. Multum etiam juvat post motum absolutum infusum calidum sorbillare, sic enim perspiratio augetur, sanguis magis diluitur; unde e re erit ex herbis diaphor. & resolv. cum roborant. junctis ea concinnare, v. gr. herb. veron. beton. meliss. cort. citr. aurant. Ubi vero virium debilitas motum non permittit, insignis utilitatis sunt frictiones cum pannis calidis institutæ, præsertim in conclavi temperate calido; hoc pacto enim intenditur motus sanguinis & excretioni cuticulari consulitur.

§. XXXI.

Circa somnum & vigiliis quæ tenenda sint, expono.

Somni & vigiliarum ratio habenda est ita, ut hoc in passu quoque mediocritas observetur. In somno modus tenendus est iste, ut nec nimius sit, nec nimis brevis. Non vero certo horarum spatio hic senes alligamus, verum tamdiu dormiendum ipsis esse censemus, donec nulla in somnum ulterior sit propensio. Et si corpus post somnum levius sit factum, viresque recollectæ, finiendus est; si vero adhuc caput torpet, & membra gravia sunt, plus somno indulgendum censemus, id saltem monemus, ne nimius sit, nam sic etiam capiti temulentia, & membris gravativus sensus inducitur. Deinde, quoad fieri potest, jubemus, ut somnus capiatur in conclavi satis spatiofo & aere puro imbuto, & corpus stragis

stragulis bene muniatur ; sic enim salutaris sæpe fit diapnoë, quæ post absolutum somnum non est intercipienda ; verum infuso calido promovenda, & corpus in lecto detinendum, usque dum mador remiserit. Somnus meridianus utilis etiam est, præsertim si is de nocte fuerit interruptus, & corpus agilius reddat. Vigiliæ præcepto novo opus non habent ; nam ingruente somno finiendas censemus ; nec in longius tempus protrahendæ sunt, damnum enim in corpus inferunt.

§. XXXII.

Excreta autem & *retenta* ita se habeant, ut illa his sint æqualia. Retenta vero sint blanda, dulcia, & temperata verbo naturali crasi prædita. Excretionum autem præprimis tres species sunt custodiendæ ; ea, quæ per cutim, alvum, & urinam fit. Illa, si corpus ab auræ frigidi-
 oris accessu muniatur, viget ; per motum vero convenientem, infusa calida, & sæpe sub somno corpore probe tecto intenditur ; ista sub intestinorum robore salvo, ciborum congruorum ingestione, & sufficienti potu legitime se habet ; per cibos vero lenientes, stimulantés leniter etiam excitatur ; hæc motu & potu sufficienti etiam salva est. Præprimis vero alvina officii sui solet oblivisci, quod morbi venturi est indicium ; quare laborandum est, ut ea quantocius in ordinem redigatur, per iuscula pinguia, gelatinosa, prunata, & passulata. Nam curandum est semper, ut semel minimum intra diei spatium alvus officio suo fungatur. Reliquæ excretionés, quæ periodice fieri solent, & præprimis sanguineæ etiam custodiendæ, & præsertim circa id tempus, quo fieri consueverunt, accurata in victus vitæque regimine tenenda est
 diata,

*Excretionés
 quomodo en-
 randæ, &
 quæ retento-
 rum sit con-
 ditio.*

diata, & si segnius fluant, moderate sunt excitandæ. Si vero demum cessent, sed nimia in venis alatur sanguinis copia: artificialis excretio per Venæsectionem in talo tentanda, quod in iis etiam jubeo, qui spontaneas sanguinis evacuationes non habent; sed circa consuetum tempus reiterandæ sunt, nisi virium immineat defectus. In quibus certis temporibus coryzæ, sudores, diarrhoeæ fieri solent, iis etiam accuratum regimen præcipio in sex rebus non-naturalibus, neque vero hæ excretiones supprimendæ sunt; verum potius studendum, ut quod ad diarrhoeas, coryzas attinet, eæ purgato corpore avertantur.

§. XXXIII.

*Animi quies
conservat,
motus de-
struit sanita-
tem.*

Ad vitam incolumem ducendam multum valent animi tranquillitas & quies; quantum enim motus corporis valetudini inservit, tantum animi quies sanitati etiam conducit. Studendum itaque ut animus sit pacificus, lætus, decora voluptate perfusus & in quiete compositus. Contra omnes immoderati animi affectus sanitatem violento velut modo convellunt; sunt ex horum censu mœror diuturnus & angor; terror, ira, invidia &c. Impri- mis vero senibus autor sum, ut a venere sibi caveant; nam vires hoc pacto prosteruntur & mors, quæ diu protelari adhuc potuisset, subito acceleratur.

§. XXXIV.

*Ex medica-
mentis hæc
senibus pro-
ficiunt.*

Ex medicamentorum penu pro senum valetudine tuenda & conservanda hæc laudo, quæ digestionem succurrunt; excretionem promovent; obstructions referant; sanguinem depurant, nimium imminuunt; & in decrepitis vires custodiunt. Ad digestionem juvandam nec

non

non chylum depurandum & spirituosius paribus imbuen-
dum præ omnibus laudem merentur amara cum aroma-
tibus ventriculo amicis nupta. Instar omnium esse pot-
est Elixir stomachicum Illustr. & laude mea majoris Dn.
Fr. Hoffmanni, vel ad ejus exemplar compositum cum
menstruo vero alcalino potius, quam spirituofo extra-
ctum, ex Extr. cent. minor. C. calcar. pimpin. alb. ca-
lam. arom. r. an. ana unc. j. cardam. cinnam. cort. aur.
rec. Inccin. ana drachm. Vj. croc. orient. drachm. iij.
Extrah. l. a. multo præstantiores vires acquirit, si cum spir.
sal. dulc. nuptum propinetur. Excretiones promovent
& speciatim transpirationem infusa herbarum calida,
quale est quod §. XXX. laudavimus; vel quod acui et-
iam cum cinnam. card. bened. & scord. parte potest, ne-
que pro pectoris impuritatibus salsis emolliendis & in-
volvendis inutile erit Rad. glyzirrh. & anis. stell. addere
Ea vero quæ per urinam & alvum fit excretio, optime
aquis mineralibus temperatis, intenditur, quales sunt Sel-
teranz, imo si vires adsunt, Carolinz etiam, præter virtu-
tem enim alvum & urinam moventem, obstructions re-
ferant, corpus depurant, & digestionem etiam juvant, si
scilicet sub debito regimine usurpentur. Saluberiorem
virtutem acquirunt hi fontes, si cum sero lactis dulci,
vel insignius cum lacte asinino miscentur; non tamen
laude sua defraudamus pilul. balsam. infusa mannat. c.
rhab. &c. Sanguinis quantitatem optime V. S. pruden-
ter instituta imminuit; quod divinum est pro vita pro-
longanda remedium, sed cautione opus est. Vires la-
bascentes erigit. Bals. vit. Illustr. Fr. Hoffmanni saccharo si
instillantur aliquot gutt. vel etiam in Elæosacharum re-
digan-

digantur, aut liquor analepticus, quem pro senibus compositum exhibet Illustris & Celeberrimus Dn. Frid. Hoffmannus in Diff. de valetudine senum tuenda. Sed non pauci sunt, qui usum aquarum mineralium contemnunt, & multi lactis asinini usum derident. Verum ut iis obviam eamus brevibus affirmo, quod vel in doctorum remedium principia non inquisiverint; vel experientia, quid præstantissima hæc simplicia possint, destituti sint. Quantum autem ad aquarum medicinalium usum attinet, de iis longe minor jam est controversia, & lites ferme obmutuerunt, ex quo Celeberrimus Dn. Frid. Hoffmannus per diversa cum dictis his fontibus instituta experimenta a priori docuit, quam salutaria contineant principia, qualia in nullo summa etiam arte composito medicamento pharmaceutico sunt unita, ad humores diluendos, depurandos, obstructions & infarctus expediendos, excretiones facilitandas, partes roborandas; & ex quo frequentissima praxis & felix confirmavit cum summo plurimorum ægrotantium levamine, dum congruo & prudenti aquarum harum usu contumaces & rebelles chronici morbi sunt expugnati, quam divinum in his fontibus tam calidis & frigidis lateat auxilium. Quod ad lactis asinini usum attinet, illius etiam ingredientia saluberrima Idem Clariss. Autor in Dissertatione de mirabili lactis asinini in medendo usu pro more suo erudite exposuit, & quantum humoribus acris, falsis depurandis convenient, & ad vires erigendas demonstravit. Si ab experientia petatur testimonium, instar omnium esse poterit insignis locus, quem sæpe laudatus Vir in System. Med. Tom. III. Sect. II. Cap. VIII. de

Specif.

Specif. §. XXIV. recenset ex Patini Epist. Tom. II. neque desunt observationes satis celebres & insignes de mira ad sanitatem tuendam & morbos curandos lactis hujus efficacia. Neque vero credendum est, ac si dicta hæc remedia absolutam habeant vim & potentiam sanitatem conservandi vel restituendi, discrimine enim opus est, & attendenda corporis constitutio, & viscerum conditio, temporis etiam habenda est ratio, & præparandum corpus ad horum usum, si salutaris expectandus sit finis. Quod si enim in corpore viscera jam sint corrupta, vires ferendis aquis impares, & stomachus nimium enervatus, plus detrimenti accipitur ex horum usu, tantum abest, ut salutaris attendatur eventus. Sed nemo hinc culpam in dicta hæc auxilia conjiciet, cum corporis conditio, & minus accurata indicationum dijudicatio hunc errorem pepererint.

§. XXXV.

Cum autem in superiori §. mentionem injecerimus medicamentorum quorundam, quæ viribus labalcentibus sint auxilio, atque eas sustentent, non possumus non *Monitum quoddam necessarium.* monere, ne eorum usus sit frequens nimis ac reiteratus; neque etiam largus; verum ita hoc medicamento utendum, ne æstum nimium augendo vires depauperetur potius, quam augeat. Idem de omnibus aliis confortantibus, & cordialibus tenendum. Hic vero taxandum etiam non immerito quorundam pessimum morem censeo, quibus præsertim si ætate adultiores fuerint, in usu est, ut superingerant semper absoluto cibo potum aquæ cujusdam ita dictæ vitæ, qua roborari stomachum, & vires incrementum persuasum habent. Nonnullis vero placet jejuno

ventriculo eas haurire pessimo etiam ausu. Nam cum per digestionem succus lactiformis ex alimentis fit extrahendus, qui etiam cum lacte maxime convenit; omne autem lac affuso spir. vini, ex quo prædictæ aquæ parantur, in coagulum abeat: hinc iudicatu facile est, quam noxius ad sanitatem sit hic potus. Quare non possum non ab ejus usu frequenti & repetito dehortari, nisi forte sub ea, quam superius tradidimus conditione. Non enim opus his auxiliis habet, qui rerum non-naturalium usum ita, ut præscriptum est, dirigit, atque a nimis lucubrationibus, mentis fatigationibus & sollicitudine sibi cavet.

§. XXXVI.

Dicta hæc consilia & auxilia insigni gaudent virtute ad sanitatem conservandam & vitam prolongandam. Sed opus est, ut in tempore iis utamur, nec in annis valentioribus senectutis præsidia consumi debent, necque vero tamdiu ab horum usu desistendum, usque dum dicta in corpore se sistant incommoda; nam præservationem non curam promittimus. Hæc qui attente considerabit, is efficiet, quo in longam annorum seriem vitæ suæ protrahatur.

F I N I S.

